

儀
禮
節
解

儀禮節解

京山郝敬著 男千秋石校刻

讀儀禮

夫道莫大于禮。天高地下。萬物散殊。而禮制行矣。故夫禮未可一端盡也。聖賢以禮脩身。以禮教人。而不舉其數。惟曰非禮勿視聽。非禮勿言動。斯須不可去身。非擇目而行禮也。有冠昏喪祭。則禮行。無冠昏喪祭。則禮廢。如是則禮之行者寡矣。凡禮之無目者。目所不能盡也。

聖人盛德至善。從心所欲。自然周旋中禮。如論語鄉

黨一篇皆聖人從心之矩曲禮三千悉由此出惟其有溫良恭儉讓之意而後有鞠躬踧踖之容虛文浮格似是而非是象恭也承迷習醉可由而不可知是凡民也故聖人教人以禮而其言禮以約得其要卽一拜一揖見古人之精神不得其要雖三千三百木偶而衣冠耳

禮非強作是人道之經緯無禮則無人道孔子曰仁者人也親親爲大義者宜也尊賢爲大親親之殺尊賢之等禮所生也仁義生尊親尊親生等殺等殺生禮天地之大德曰生知生之說者則知天知天之說

者則知禮。天者莫之爲而爲。禮者亦莫之爲而爲。凡是書所言冠昏喪祭品節秩序皆天理之不得不然。其間牽強拘泥煩瑣迂僻強世難行者則時勢古今之異。學禮者所以貴達也。

聖學端本澄源先立乎其大而小者不能奪。故賢人用禮執其上。凡民識卑累重既失其大而益忽于小。鹵莽滅裂乃禽獸。故凡民學禮執其下。飲食衣服升降楊襲坐起拜立別其嫌而明其微制其外而養其中。故曰人之所以異于禽獸者幾希。庶民去之。君子存之。學禮者所當默識也。

不讀儀禮不見古人周詳縝密之思然善讀者舉其一篇而十七篇要領皆可知讀十七篇而人倫日用品節度數無不在其中矣不善學者執數求多按跡模擬如鄭玄諸人十七篇猶以爲未足耳

儀禮較周禮切近周禮懸空鋪張儀禮周旋裼襲合下有實地然止于十七篇者用禮之家十七副局面耳推而演之三千三百皆可義起作者借爲式樣使天下後世知禮之爲儀詳密如此非謂世間禮法一皆有其題目如十七篇也

鄉射卽鄉飲酒禮大射卽燕禮旣夕卽士喪禮有司

徹卽少牢饋食禮。其實止十有二篇。然不啻詳已。昔之作者。舉所嘗聞。潤色補綴。使後世知禮之儀文。如是。古人陳迹如是。非責後世一一拘守。亦非士大夫禮存。天子諸侯禮亡之謂也。大抵冠昏喪祭。朝聘燕饗。禮之大物。止此。飲食男女。養生送死。人生日用。止此。升降進退。周旋錫襲。行禮節文。止此。天子諸侯同此。人倫同此。儀則隆殺多寡。因時制宜。孔子所謂殷因於夏禮。周因於殷禮。所損益可知。而人主爲禮法之宗。天子諸侯禮難預設。若一一定爲常制。使百世共守。則是禮有因無損益。雖二帝三王不能參卽今。

十七篇中。世守者能幾何哉。

十七篇不言天子諸侯禮。鄭康成因冠昏喪虞禮皆稱士。遂謂禮獨士存。拘也。士先四民。禮義由士出。故言禮繫之士。公卿大夫皆士之仕者。上而諸侯。又上而天子。可引而伸矣。故夫特牲不言士。少牢不言大夫。士用特牲而不止士也。大夫用少牢而不止大夫也。但舉隆殺爲例耳。讀禮者固執不通。遂謂天子諸侯禮亡。亦猶夫禮經存而樂經亡之陋說也。

儀禮非盡先聖之舊也。後儒纂述舊聞。雜以歷代儀注。會最成書。皆士大夫行禮節目。朱仲晦欲以儀禮

爲經。夫儀之不可爲經。猶經之不可爲儀也。經者萬世常行。儀者隨時損益。父子君臣夫婦長幼朋友。經也。禮儀三百。威儀三千。儀也。皆以節文斯五者。五者三代相因而儀者所損益可知也。世儒耳食朱說。爭騁胸臆。爲纂爲考。其破裂不足觀也。

昔子游譏子夏之門人小子。洒掃應對進退。抑末矣。說者病其言過高。然亦足以見聖門教人有本。未嘗屑屑儀文可知。子曰禮云禮云。玉帛云乎。言禮則曰復曰約。言教則曰一曰不多。繁文縟節。非聖人語上之教。是商師之學也。

儀禮皆古人虛影。學者精神淹貫。方有理會。若但尋行數墨。如鄭康成輩。較勘同異。辨正文字。按本演習。如傀儡登場。無生機血脉。老聃所謂芻狗。莊生所謂蜩甲。辜負聖人雅言之意。

是書詳處太瑣。如祭醴始扱一祭。又扱再祭。執皮內文兼執足。三分庭一在南。鄉飲工左。荷瑟後首。掩越內弦。牲體肩臂脊脇肫脰。一骨二骨之類。何其瑣也。及其行禮大節目。如冠于廟而竟不及其祖禰。既冠見母。見君。見鄉里親戚士大夫。而竟不及其父。婚禮自壻迎婦降西階。以至入室同牢。燭出燕息而竟不

言夫婦拜至。明日新婦見舅姑。饋食醴饗而竟不及夫壻。此類又何畧也。如謂但舉其槩而已。則後儒讀禮何爲往往添補之乎。

作儀禮者。亦未及親見古人。故其辭多罔象。如凡禮行于廟。竟不言告廟之儀。冠冕衣裳皆不定其制度。物色廟寢堂階房室戶牖皆不明言其向背。使後人猜度影響。迄無定論。每于篇終引記聞參伍。其無畫一之見可知。親見古人必不爾。

儀禮作于衰世。故其儀文雖詳。而大綱不清。雖不及天子之禮。而時或雜越以大夫亂諸侯。諸侯亂天子。

往往有之。如燕禮稱君爲公。是諸侯之禮也。諸侯稱公。已爲僭矣。而其臣又有稱諸公。位在卿大夫上者。惟天子有三公。諸侯之臣貴無加于卿而稱公。是亂天子也。鄭玄謂爲大國之孤四命。此周禮典命之說。周禮亦非古也。稽古以孟子爲正。孟子曰。天子一位。公一位。侯一位。伯一位。子男同一位。凡五等。君一位。卿一位。大夫一位。上士一位。中士一位。下士一位。凡六等。此周班也。何嘗諸侯有臣稱公。大國卿上有孤稱諸公者乎。鄉射禮諸公席三重。大夫席再重。按尚書顧命。王席亦三重。周禮司几筵職亦云。王席三重。

而禮運曰王席五重諸侯席三重。今云諸公席三重。大夫再重亦亂也。周禮天子射三侯九節諸侯七節。大射禮諸侯也。而侯道九十弓。是亂天子也。惟天子之事稱大。與諸侯射則用大侯。稱大射。諸侯與其臣射用大侯。稱大射亦亂也。說者謂士冠士昏士喪皆士禮。然冠用爵弁。婚乘墨車。遣馬有繁纓。遣奠用五鼎。容非僭與。周衰禮廢。諸侯強梁。大夫士無等。作者承襲其訛。非盡先聖之舊也。昔夫子作春秋。于諸侯名號禮樂亡等。皆因之而不變。欲直其事以存亂亡之蹟。示後世是非之公耳。禮經正名辨分別嫌明微。

烏可以相倣禮襲其義訓亂也言禮與言春秋異
世儒未達耳

讀禮切忌附合凡禮家言非出一人一手世遠傳疑
安得盡同但據本文解釋同者自然脗合異者不妨
并存牽強比附失之愈遠鄭玄諸人所以多爲之說
而愈紛也

世儒欲以儀禮爲經割諸禮附之嗟夫諸禮家言雖
聖人復生不能盡合矣虞夏殷周因革損益尚不相
襲以孔子之聖學夏商之禮無徵不信而曰吾從周
況世儒款啟欲彌縫新故不同之跡以通之百世所

謂愚而自用。裁及其身者也。就使補輯完備。校勘精切。能必一一可用之。今日乎。畧舉其近者。如士冠不
論有爵無爵。輒用命服。今可乎。士親迎。乘大夫車馬。
今可乎。女子既許嫁。笄矣。出教于宗室三月。今可乎。
納采。使者至門外。主人迎拜不答。入拜又不答。今可
乎。主人迎賓。門外先入。及階又先升。今可乎。主人門
外送賓。再拜。賓遂去不顧。今可乎。男女相拜。男拜手
伏地。女子直立肅拜。今可乎。士相見。賓五請始得主
人一出。又不升堂。止于大門內一拜。今可乎。臣侍食
于君。不待君命先飯。徧嘗飲食。今可乎。侍食于先生。

異爵者先餽而後已。今可乎。盛服行禮。忽爾袒衣旋襲。又袒。又襲。如是數十次不已。今可乎。尊俎爵。能供饌之具。不設几案。錯諸地。今可乎。食飯不用箸。以手。今可乎。書必刀。文必篆。冊必竹簡木板。今可乎。人死三日然後殯。斂。今可乎。明器苞匱等無用之物。併納諸壙中。今可乎。凡送幣獻酬之類。賓主不同拜。送者立。俟受者拜。而受者又立。俟送者答拜。雖君臣父子皆然。今可乎。賓酢主人。不親舉爵。主人自酌以飲。今可乎。食不設主席。主人亦不陪食。今可乎。孫爲祖尸。父拜其子。明日僨尸。則子爲父客。受其獻酬。今可乎。

舅下堂親洗爵獻新婦。今可乎。婦翁出門再拜送新壻。今可乎。子冠懷脯見母。母再拜受。今可乎。父母爲子喪三年。父在母喪與妻同服。庶子後父爲其母總麻。今可乎。國君燕卿大夫。僅屠一狗。今可乎。君父死。臣子爲諡。幽曰幽厲曰厲。今可乎。其他大事朝聘祭享。小事拜起坐立。難通行者。不可盡舉。必欲一一可信。可傳。使人必從。雖聖人復起。能乎。

昔人謂儀禮難讀。未知文辭難耶。義理難耶。義理不與于他經。文辭煩瑣。詳思自解。三禮惟戴記多名理。周禮多疑竇。儀禮差易。鄭康成拘泥名理。殊非所長。

人見其附會多端。以爲特詳于制。然紕漏處難可。二數也。每憑管見。時加檢舉。貴使學者自得。非敢與之角短長也。如冠禮緇布冠缺項。本謂冠後有缺。未合。約之以組。鄭謂缺讀如詩有頍者弁之頍。圍髮際也。又白屨以魁。柎之魁。屨頭也。柎與跗同。足底也。卽今之鞞樣。反頭爲底。是也。鄭解魁作屨。柎作注。謂以屨蛤附屨使白也。又旣冠見母于東壁。東壁者。廟中東偏室。東爲東壁。西爲西壁。士虞禮云。饔餼在東壁。西面。特牲記云。饔餼在西壁。子冠母亦在廟。鄭謂母在闈門外。廟中通宮中門曰闈門。則是以闈門之外。

爲東壁也。古制左廟如鄭說。廟不在宅之右乎。東壁
爲闔門。西壁又何門乎。昏禮姆纚笄宵衣謂玄
色衣也。故特牲饋食禮亦云。婦宵衣以其繼喪祭後
吉尚玄。變于素也。鄭改宵作綃。引詩素衣朱繡之繡
又舅姑醴婦。婦疑立于席西。凡不正相向曰疑。士相
見禮亦云不疑君。謂不敢邪向君也。鄭解疑爲定立
之貌。又上大夫相見以羔。四維之如麇。麇小鹿羔小
羊。鹿野物難馴。執之須繩維其足。執羔亦當如小鹿
四維也。鄭謂執麇有成禮。執羔如之。鄉飲酒禮主人
再拜崇酒。崇者獎藉之意。賓告旨。故主人謝其崇獎。

已酒。鄭云：崇克也。酒惡相克實也。又主人釋服乃怠。
司正謂主人朝服拜謝賓歸釋服，卽治具勞司正，非
謂息司正不用朝服也。猶聘記云：幣之所及，勞不釋
服。皆敏速意。鄭謂脫朝服更服玄端而不知玄端卽
朝服也。鄉射記云：君射于國，則皮樹中。郊則間中。大
夫兕中。士鹿中。中者盛算之器，刻木似獸形，間中似
驢皮樹中似馬，卽易所謂駁馬也。馬有駁，樹亦有駁。
詩云：隰有六駁。駁，樹皮斑駁似馬，故云皮樹。鄭知間
之爲驢而不知皮樹之爲馬也。燕禮主人媵觚于賓。
媵與賸通，猶副也。正獻之外謂之媵爵。鄭解媵爲送。

又疑爲騰字之誤。燕禮記云：栗階不過二等。栗與歷通。凡歷階者一足踐一級。故曰不過二等。過二等則超越失儀。鄭謂不盡階二等。左右足一發升堂也。大射禮：連設三侯。有干侯。參侯。大侯。參侯立二侯中。故曰參。干侯在內。近而易犯。故曰干。猶水邊曰河干也。鄭謂參作糝。干作豳。鄉射記：侯道弓二寸以爲侯中。中卽鵠也。考工記云：侯三分其廣而鵠居一。鄭疑其過大。乃以侯中爲全侯。不知古人射主行禮。大其鵠使人易中。故鵠本大鳥也。鄭云鵠小鳥。又鼗倚于頌磬。西紘。紘者鼗兩旁懸耳繩。如冠之有紘。而鄭以紘

爲懸磬。聘記。殯賓不拜。沐浴而食之。本謂殯執食禮。輕不以君命。故賓不拜。道途風塵。至館沐浴。乃食。鄭謂沐浴尊君也。尊君則何以不拜。又上介不襲執圭。賓襲執圭。公授宰王。裼還王。賓襲還璋。賓裼。凡執王單藉曰裼。重包曰襲。王有繅而赤手執之曰裼。以衣掩其手而併繅執之曰襲。故曲禮及聘記曰。執王有藉者裼。無藉者襲。鄭泥王藻見美克美。以衣裘解謂執王時。或裼裘或襲裘也。又君使大夫還王。賓升自西階。自大夫左受王。退負右房而立。右房卽東房。升堂以東爲右。猶入門東之言入門右也。鄭謂右房爲

西房。古宮室制未有西房者。又聘記大夫來使無罪則饗之。過則餼之。本謂大夫以謝罪通好來與假道經過者。或饗之。或餼之。鄭謂嘉賓則與饗。有過則不饗而餼之。將以附合聘義。愧厲之說。其實非也。旣飯而飲酒曰醕。醕者胤也。繼續之意。鄭謂醕之言演也。演安其所食也。公食大夫禮。鼎竈若束若編。本謂陳鼎門外。防不潔。故竈蓋其鼎。而以繩編之。束之。鄭謂以茅爲鼎竈。茅可以爲竈乎。觀禮匹馬卓上。九馬隨之。謂十馬以一馬居前爲上首。九馬并列于後。所謂庭實之旅也。鄭云。卓如卓王孫之卓。猶的也。以素的

一馬爲上。書其國名。後當識其何產。引晉屈產之乘。爲證。喪服斬衰。直經絞帶。本謂以苴麻絞爲首經。又絞爲帶。絞帶與經同。故謂之要經。所謂布帶。則禮服之大帶也。與要經異。而鄭云要經象大帶。絞帶象革帶。則是以布帶爲要經也。又朝一溢米。夕一溢米。溢盈也。盈一握曰溢。溢之言揜也。一手所握曰揜。與搗通。鄭謂二十兩曰鎰。二十四分升之一也。又繼母服齊衰。與因母同。因母者嫡母也。因嫡而後有繼。故繼謂嫡曰因。鄭訓因親也。又女子子在室。爲父布總。箭筈髻。衰三年不言裳。同衰可知。鄭云婦人衣裳不殊。

按詩綠兮衣兮。綠衣黃裳。又云衣錦褻衣裳。錦褻裳。非婦人衣裳。殊與又無服之殤。以日易月。本謂長殤大功九月者。爲喪九日。中殤小功七月者。爲喪七日。如不飲酒。不作樂之類。鄭謂生一月者。哭一日。有如一八歲殤。無服。不當哭百日乎。是毀過于斬衰矣。又大功章爲夫之昆弟之婦人。子適人者。卽同居繼父之子也。叔伯兄弟俱死。而叔伯母猶爲之服。鄭以婦人子爲女子子。喪禮幙目用緇。幙與冪同。遮蔽也。握手牢中。牢猶籠也。本謂空其中以籠尸手。鄭謂幙讀如縈。牢讀如樓。又履綦結于跗。跗足下也。如花跗弓跗。

前云屨魁柎正與此同謂屨底也死者著屨連底束之使牢固鄭以跗爲足上又襲尸設決麗于絜自飯持之設握乃連絜本謂將飯舍先以決繫麗其指于腕間使手不旁垂乃施握交臂如生時也鄭于此段文義全不解又大斂饌髒豆兩其實葵菹芋芋卽所謂蹲鴟鄭謂齊人語全菹爲芋又卜喪曰宗人受龜示高高猶上也本謂龜甲上可兆之處先以示主人而後灼周禮大卜亦云眡高猶俗言上頭高處云爾鄭謂龜甲高起龜板平未聞有高處也喪禮有遣車卽送葬之乘車鄭謂爲土木偶車納于壙中者又喪

禮主人脫髦猶言散髮也。髦與毛同。始死孝子投冠
留筭纚。小斂解去筭纚以麻括之。旣殯成服解其麻
加冠經皆所謂脫髦也。鄭以髦爲子事父母之飾。又
隸人湔廁滌死者便器也。鄭謂閉塞溺廁又邊豆實
具設皆巾之謂旣實菹醢果脯之具設必加巾。鄭訓
具偶也。成偶乃巾一邊一豆不巾旣夕記朔月薦新
則不饋于下室下室卽室也。對堂上言曰下。鄭謂下
室內堂也。又祭前三日筮尸常禮也。特牲與少牢同
鄭不解少牢宿與前宿之文。遂謂士祭前三日筮大
夫祭前一日筮。避君禮也。夫用筮同何爲又避其日。

手。少牢主婦被錫衣。錫通作緡。細布也。與錫衰之錫同。朝服布十五升。用其半爲錫衰。此錫衣則用朝服布也。主人朝服。故主婦被錫衣。漢人謂曳阿錫是也。鄭欲附會周禮追師之文。謂錫衣當作髮鬘。他如此類。不可勝記。而隱僻譌張。皆似此。附見各章。

今人用字尚象。古人用字尚音。尚象者。辨其點畫。尚音者。切其意響。二者不同。然文字以義理爲主。苟恣意假託。則愈譌張失真。如角柶之柶爲匙也。賓厭介之厭爲壓也。孝子圭爲之圭爲蠲也。苴荊茅之苴爲藉也。一溢米之溢爲盭也。栗階之栗爲歷也。閭中之

間爲驢也。錫衣之錫爲錫也。交錯以辯之。辯爲偏也。醕爵之醕爲胤也。綏祭之綏爲墮也。面狀之爲柳也。若此類響切而意合。故古人隨宜用之。若夫緇布冠缺項之缺以爲頰也。騰羞之騰以爲媵也。媵爵之媵以爲騰也。握手牢中之牢以爲樓也。幘目之幘以爲縶也。醕爵之醕以爲演也。純衣之純以爲縑也。崇酒之崇以爲亢也。旅酬之酬以爲周也。參侯之參以爲糝也。錫衣之變而爲髮髻也。羊之變而爲全菹也。若斯之類。風影附合。講張爲幻。不可從也。鄭之訓詁多此類。俗儒一切耳食。引以證文字。後生不察。轉相

師承其誤可勝窮乎

儀禮成于後儒手。而古籍亡矣。不復見先王朝會盛
典。故觀禮祇述其梗槩。較諸篇爲畧。而愚顧喜其近
情。足以折周禮四時朝見之謬。篇末又記天子率來
朝諸侯祭告羣神。未必盡合古。然大槩可觀已。鄭康
成偏執周禮明堂位之說。補葺附會。甚無謂也。至如
喪服傳解經。一一明允。鄭牽強引證。反疑傳文爲誤。
近代儒者纂三禮。併傳割棄之。鄭始作俑也。
凡古人禮服。通謂之朝服。禮服衣裳。通謂之端衣。多
玄纁。亦有纁者。裳多用纁。亦有素有黃有雜色。及大

帶與韠色。時或變易。而衣色則少有不玄。緇者矣。卽龍衮亦以玄帛刺繡。故曰玄衮。無繡文者皆所謂玄端。緇衣耳。首服自士以上。凡大事皆得用弁。自大夫以上。凡大事皆得用冕。至于玄冠。則自士庶人以至天子皆用之。此其大較也。古人服色原不煩瑣。少牢饋食。主人朝服卽是祭服。昏禮卜筮鄉飲燕射聘享皆用朝服。故古人禮服皆稱朝服。爲其可以見君。則無禮不可用也。自周禮五冕之說興。鄭康成極力附會。影響猜度。未必盡合古人之舊。愚于周禮司服辨之詳矣。讀者舉所知。闕所疑。不必如鄭強質也。古人

廟制前爲堂。堂北爲室。室西南隅爲奧。房與室接。室東爲房。而戶牖皆南向。房室之外。卽是堂之北。房室皆有牖。有戶。戶皆在牖東。牖皆在戶西。室牖當堂正中。所謂負依處也。堂前爲階。階不中堂。東階當房牖之南。西階當堂之西南。主賓雖行禮于兩階。而堂前無復牖戶之隔。其實皆堂上也。自堂上直下東西兩牆。謂之序。序之外。堂之下。東西相對。各有堂有室。是爲夾室。卽今廂房也。堂下爲庭。庭中有碑。以定日景。庭南爲門。門內有途。分左右。東西行各數武。折而北。當東西階。賓主由此揖讓升堂。門內外東西各有堂。

有室謂之塾。此其大畧也。鄭註皆未分曉。古者燕會
席地。坐則兩膝著地。以股貼足。是謂安坐。以兩膝著
地。直身起跪。謂之危坐。安坐。卽尸賓及先生長者坐。
獻酬畢。脫屣升堂。坐之類是也。危坐。如聘禮賈人西
面坐。啟櫝不起而授宰。特牲少牢宗婦執籩戶外坐
之類。卽今之跪是也。鄭註亦未分曉。又古者婦人無
跪拜。唯喪則稽顙。少儀云。婦人雖君賜。肅拜。肅拜者。
立拜也。君賜且立拜。他可知已。故篇中凡婦人拜皆
立。而男子答拜則頓首。故婦人必俠拜。初一拜。男子
答而起。婦人又一拜。故凡男子拜手。則必奠贄。奠爵。

婦人立拜。執贄執爵昏禮。婦執笄棗栗進拜。奠于席。特牲禮。主婦致爵。左執爵拜。有司徹尸酢。主婦亦執爵拜。是也。惟昏禮新婦三月廟見。則稽首著地。故禮文曰拜扱地。特言扱地者。明其殊于常拜。亦如男子稽顙也。鄭註皆未了然。

飯之品。黍稷稻粱。鄭註未分曉。凡稻粱皆粳米。其粒長而大。古人以方器盛之曰簠。黍稷之粒小而圓。古人以圓器盛之曰簋。稻品甚多。其粒最長者可半寸。故以梁名。如屋梁。強梁之梁。粳米亦取強梗之意。食之強益人也。又梁者良也。精鑿意。凡米之精而粒長。

大者皆稱梁。故美食曰膏粱。又穀亦有梁。其稈穗如
蘆葦。品最下。楚人謂之高梁。亦以秸長實大得名也。
禮記君沐梁。則梁米。而士亦沐梁。則高粱耳。凡言黍
稷稻粱者。皆高粱也。稻宜水。黍稷高粱宜陸。稻南方
卑濕處多。黍稷高粱比地高陸處多。中原地饒黍稷。
而稻則希有。凡宜陸者皆可稱梁。言其亮而高也。宜
水者皆可稱稻。言其滔而濕也。故古者酒醴多用黍。
大夫饌賓無稻也。黍最早熟。暑月可食。故名。而稷秋
熟。則今之粟也。粟稷二字音義通。稷之言謏也。尸起
曰謏。嚴肅之意。詩云既齊既稷。亦肅意。蓋秋氣也。穀

秋成故曰稷百穀皆秋成故粟者百穀之總名也黍稷稻粱麥爲五加菽爲六分二麥爲七分二菽爲八加麻爲九九種之類又細分是謂百穀

儀禮節解卷目

第一卷

士冠禮

第二卷

士昏禮

第三卷

士相見禮

第四卷

鄉飲酒禮

第五卷

鄉射禮

第六卷

燕禮

第七卷

大射儀

第八卷

聘禮

第九卷

公食大夫禮

第十卷

覲禮

第十一卷

喪服

第十二卷

士喪禮

第十三卷

既夕禮

第十四卷

士虞禮

第十五卷

特牲饋食禮

第十六卷

少牢饋食禮

第十七卷

有司徹

卷目終

儀禮節解卷一

郝敬習

儀禮者禮之儀周衰禮亡昔賢纂輯見聞著爲斯儀
非必盡先聖之舊然欲觀古禮舍此末由矣篇凡十
有七學者苟無恭敬之心讀此書則如觀傀儡耳三
禮所以先記也

士冠禮第一

冠爲成人之始故諸禮首冠古之有德行道藝已仕
未仕者通謂之士人未有生而貴者其初皆士也故
禮多由士設惟士習于禮所謂由賢者出也据士觀

禮而禮皆可知解者遂謂天子諸侯禮全亡不盡然也

士冠禮筮于廟

古廟

門主人玄冠朝服縹帶素鞶卽位

于門東西面有司如主人服卽位于西方東面北上筮

與席所卦者具饌于西塾布席于門中闢西闕外西面

筮人執筴抽上韞

獨

兼執之進受命於主人宰自右少

退贊命筮人許諾右還

旋

卽席坐西面卦者在左卒筮

書卦執以示主人主人受眡反之筮人還東面旅占卒

進告吉若不吉則筮遠日如初儀徹筮席宗人告事畢

此擇冠日也筮揲策求卦也筮吉日重其事也廟稱

廟也。筮于門外。不于廟中者。不敢必神意也。主人將冠者之父也。玄冠。周人委貌之冠。玄。繪爲之。朝服。見君之禮服。十五升麻布爲之。古人禮服。通謂之朝服。亦卽所謂玄端。緇衣也。帶。大帶。以繪爲之。韠。蔽膝。以韋爲之。門。廟門。有司。羣吏也。卽宰宗人與筮人卦者之屬。西方。廟門西北上。以次立而南也。筮。筮策。席蒲筵。所卦者。畫爻記卦。刀。筆。木簡之類。具。備也。饌。陳也。門。中西扉之中。闌。當兩門間。置木室。門者也。闕。門限。筴。著策。韝。藏筴器。上韝。韝蓋也。兼執左執筴。右執韝。進而東向。受主人問筮之命也。命。命筮也。宰。家臣之

長自右傳命自右出少儀云贊幣自左詔辭自右少
退不敢并主人也贊命贊相主人以擇日冠子之意
命筮也右還回身右轉就門中之席西面坐行筮事
也必西面者求神向陰方也卦者執簡畫爻之人居
筮人左卒筮十八變畢卦成也反以卦還筮人使占
吉凶旅占衆共占也筮還日上旬不吉則改筮下旬
如問甲子不吉則改問甲戌之類如初儀如前所行
禮儀也宗人有司掌禮者告事畢告主人也

按上古冠制小止撮髮字從寸詩謂緇撮是也夏冠
毋追殷冠章甫制皆小周人變爲委貌其制始大此

玄冠則委貌也。古人行禮之服。通謂朝服。鄭氏謂君臣朝視之服。玄衣素裳。不從冠色。裳從韠色。考之不盡然。又謂朝與廟異服。今筮于廟亦朝服。是廟朝服未嘗不相通也。大抵周人服色多尚赤。纁緇玄皆由赤入。故禮服多用之。殷人尚白。則其所勝色也。用最少。凡素與白稍異。白者素之淨練如雪。而素則白之近蒼者耳。今人衣無文。纁亦稱素。吉主玄。凶主素。故玄冠緇衣不以弔。白衣冠不以處吉。古今同也。鄭謂朝服裳帶韠皆白。亦恐未盡然。王藻云。君與大夫士帶皆素。此云緇帶。疏謂素帶而緇韠。曲爲附合。禮家

言難盡同也

按古之卜筮者盛服將事致敬而已無迎神拜送之禮蓋筮龜本受命于人吉凶禍福由人自主著龜以象告耳今世俗反聽命于著龜而禮亦異矣

主人戒賓賓禮辭許主人再拜賓答拜主人退賓拜送前期三日筮賓如求日之儀乃宿賓賓如主人服出門左西面再拜主人東面答拜乃宿賓賓許主人再拜賓答拜主人退賓拜送宿贊冠者一人亦如之

此肅賓贊也戒預告也賓謂衆賓主人之友也主人既筮得吉日將冠其子預告于朋友望其來教也賓

禮辭謙讓也。一辭曰禮，再辭曰固，三辭曰終。賓一辭遂許也。主人再拜，拜其許也。賓拜送，拜于主人去後。主人無答也。後倣此。前冠期三日，筮加冠之正賓，與筮日禮同。宿與肅速意皆通。事在越宿，故曰宿。既筮，賓卽速。是先信宿也。賓如主人服，亦朝服也。賓西面再拜，拜辱也。主人乃宿賓，致辭也。主人再拜，拜其許也。贊冠者佐賓行冠事者。尊次正賓，故主人亦親宿。若衆賓戒或不宿，或使人宿之也。

厥明夕，爲期于廟門之外。主人立于門東，兄弟在其南。少退，西面。北上有司皆如宿服，立于西方，東面。北上，擯。

者請期室告曰。質明行事。告兄弟及有司。句。告事畢。擯者告期于賓之家。

此冠之先夕爲期也。厥明宿賓之明日。夕。向暮也。期。明日行禮之期。旣戒宿。又爲期者。恐臨事不虞。致審也。于廟門外。冠禮行于廟也。兄弟。主人之親戚。少退。不竝主人立也。北上。以次南也。有司。皆如宿賓之朝服。則主人兄弟同可知也。西方。門西。擯者。主人之相禮者。請明日之期于主人。主人之宰代主人答以旦日。正明行冠事。質。正也。擯者以質明告兄弟及有司。宗人告禮畢。衆遂退。擯者以質明行事往告賓與衆。

賓之家

夙興設洗直于東榮南北以堂深水在洗東陳服于房
中西墉下東領北上爵弁服纁裳純衣緇帶韎脉韠各
皮弁服素積緇帶素鞶玄端玄裳黃裳雜裳可也緇帶
爵鞶緇布冠缺項青組纓屬于缺緇纓屬于缺
六尺皮弁弁爵弁弁緇組紃纁邊同篋篋櫛實于簞丹蒲
筵二在南側尊一甒醴在服北有筐實勺解角柶脯醢
南上爵弁皮弁緇布冠各一匣算執以待于西坵南南
面東上賓升則東面

此陳設服器也夙興冠之日早起設洗設器盛盥手

洗爵之水直當也。榮屋檐也。周人屋四注東西皆有榮。洗設于堂下東。自洗北望與東榮直對。自階至洗如堂之深。故曰南北以堂深也。陳服陳設將冠者之衣服。堂北東偏間曰房。冠于阼階。故陳于東房。墉牆也。西墉房西牆。東領衣領向東北。上以次陳設。自北而南也。首爵弁服。次皮弁服。次緇布冠服。爵雀通燕。爵玄色。以玄緇爲弁士之上服也。弁言服者首戴爵弁。則身著絲衣纁裳也。服在東房。弁與冠在西。坩服則冠者自阼階入房。自著冠。弁則賓自西階取以加之也。纁赤色。考工記三入爲纁。下曰裳。上曰衣。純帛。

也。衣以帛爲之。古禮服多用布。爵弁貴服用帛。不言色。卽玄端也。凡禮衣色多玄緇。三冠同衣。但爵弁衣帛耳。先言裳。後言衣者。衣帶同緇。故連帶言之。七入爲緇。卽玄色之深黑者。韎赤色。韐合皮爲蔽膝。卽韠也。大古無衣。以獸皮蔽其前後。聖制禮不忘初。用皮爲蔽膝。此以上皆爵弁服也。皮弁以皮爲弁。亦存古也。色與爵弁同。而飾以玉石。素積卽素裳。積折其要間。曰積。積素而衣亦玄端也。不言裳言積者。裳不恒素。言素積。別于諸裳也。周以白爲勝色。惟所宜。則用之。玄端玄衣也。禮衣制方曰端。玄黃雉裳皆以配玄。

端爲皮弁服者也。玄端素積，緇帶素鞶，可也。玄端玄
雜等裳，亦可也。但素積則素鞶，而雜裳則素鞶耳。緇
布冠，卽玄冠，所謂委貌也。緇布冠，不言服，同上玄端。
玄裳，緇帶，爵鞶，與皮弁服通。故承上接下言之。冠後
曰項。冠武後缺，不屬，以青組二條繫缺端，束之，垂餘
爲纓也。組，條也。纓，以緇色緇韜髮。古帛廣二尺四寸，
纓寬用全幅，其長六尺，與髮齊也。弁，簪也。所以貫弁
冠，無弁而有纓，弁纓曰紒。在旁，纓在後，纓之組染麻
爲青色。紒則緇組，側飾以纁，邊側也。竹器方曰篋。纓
與二笄，紒四物同篋。紒屬于笄首，笄橫弁上，紒下繞。

項而右。上結于筭末。不如冠纓。屬于缺。故別與筭纓同藏也。櫛梳也。以理髮。竹器圓曰簞。蒲筵蒲草席。用二東。序冠子一。戶西醴子一也。簞席皆在所陳衣服之南。側獨也。無並曰側。置酒曰尊。一甌醴異于醯之設。兩甌也。甌瓦器。以盛醴醴體也。酒連糟曰醴。貴初質也。尊在爵弁服北。旣服而後用醴也。篚竹器。勺以酌酒。解飲酒器。爵屬。柶匙通形如刀。七長六寸。祭以挑醴。醴有糟。故須柶。角爲之。取滑也。士喪禮。榘齒用角柶。卽此脯乾肉醢肉醬也。南上以尊爲上。自南而北。首尊。夾篚夾脯醢也。二弁一冠。各以竹器承之。匣

竹器。坫言奠也。闔物曰坫。西階下設坫。以三匱承冠弁。奠其上。賓至使三人執之以待也。南面賓自南入也。東上。以次立而西也。坫在西階西。賓入自西階升堂。行禮于阼。賓未升。執匱者階下南向自東立而西。賓升。三人轉向東自北立而南也。

按冠三加。備三代之禮。初用緇布冠服。玄端玄裳。夏禮忠也。再加皮弁服。玄端素積。素韠。商禮質也。三加爵弁服。玄端纁裳。周禮文也。鄭謂爵弁爲士之貴服是也。謂爵弁亦以皮爲之非也。謂爵弁服絲衣是也。謂皮弁服全不用絲亦非也。自諸侯以上至天子皆

用皮弁豈盡布衣乎。又謂皮弁專服素衣裳與弁色同。因論語素衣麕裘。麕子色白。故謂弁用鹿皮衣從弁色。夫弁用皮存古意耳。據周禮采璣等制。皮弁亦華美之甚。豈純用獸皮如野服乎。獸皮去毛皆白。何必鹿子。如謂鹿子毛色白。弁可以不去毛爲之乎。又謂素積則素衣。夫素端素裳。惟凶禮可用。玄端素積。玄黃等裳。皆吉禮也。朝服玄端。皆皮弁服。故聘禮皮弁朝服。賓主通用。玉藻云。皮弁以日視朝。朝服冠卽皮弁。玄端卽緇衣。未聞素衣也。惟蜡爲送終之祭。衣裳皆素。冠禮成人。貴初。質裳韠用素衣帶。亦不純素。

也。明堂位：皮弁素積，裼而舞。大夏是衣，猶見美也。其
他朝祭吉禮，雖素積素韠亦不用，而爲皮弁服同。大
抵吉衣皆玄緇，而弁與冠服通用。大夫以上用弁，則
謂弁服。士以下用冠，則謂冠服。故士喪禮襲尸，皮弁
服，祿衣緇帶。特牲饋食記云：朝服玄冠，緇帶，緇韠，少
牢禮。主人皆朝服。是皮弁玄冠朝服同也。緇布冠不
言服，承玄端玄裳，與皮弁同服甚明。非謂素衣獨皮
弁，而玄衣獨緇布冠也。蓋玄爲天色，故禮衣冠用之。
卽黑色之微赤者，又謂之爵色。緇卽玄色之深黑者。
故緇衣卽玄端。又謂燕衣。王制云：夏后氏燕衣養老。

燕玄鳥故得名。名雖四黑則一也。故緇冠卽玄冠。古布今帛。上下通用。鄭獨以爲莫夕君之服。拘也。論語云。羔裘玄冠不以弔。檀弓云。羔裘玄冠者。易之而已可也。易之云者。但不純玄。卽玄冠素衣亦可。古人衣冠隨宜變通。世儒言服色多本鄭說。夫儀禮已非古矣。而鄭註又非儀禮。言禮于今。所以難也。

主人玄端爵韞。立于阼階下。直東序西面。兄弟畢袵玄。立于洗東西面北上。擯者玄端負東塾。將冠者采衣紒。在房中南面。賓如主人服。贊者玄端從之。立于外門之外。

此內外賓主卽位也。玄端爵韠卽篇首所謂玄冠朝服也。直當也。東序堂東牆行禮負牆序立故曰序。兄弟主人親戚畢盡也。衿單也。禮衣皆單卽玄端也。洗在堂下東南兄弟輩皆立洗東北上自北以次立而南也。擯主人使迎賓者負背立也。塾門外堂負堂南面立以俟賓也。采衣未冠者之服童子尚華飾未加冠猶童子也。紒髻通卽總角。房東房古者廟制堂北爲室室東爲房房中南面立當戶牖也。賓加冠之正賓如主人服玄端爵韠也。贊者贊冠者玄端不言韠可知也。從之從正賓也。外門廟門之外大門也。古者

廟在大門內左

擯者告主人迎出門左西面再拜賓答拜主人揖贊者
句與賓揖先入每曲揖至于廟門揖入三揖至于階三
讓主人升立于序端西面賓西序東面

此迎賓也擯者以賓至入告主人主人出迎于大門
之外再拜拜迎也揖贊者不拜殺于賓也主人揖先
入導行也曲曲徑也凡廟在大門內東入大門向東
行爲一曲望廟門向北行爲二曲每曲主賓相揖至
廟門又揖旣入門分東西主賓相背一揖當塗向北
主賓相見一揖東西行當碑碑在堂下庭中稍北過

此一揖前及階相讓三主尊則主先升賓尊則賓先升敵則主升一等導賓賓乃升凡賓之道難進也序端堂東牆盡頭賓西序負西牆主人負東牆稍南避冠位也

贊者盥于洗西升立于房中西面南上主人之贊者筵于東序少北西面將冠者出房南面贊者奠纚并櫛于筵南端賓揖將冠者將冠者卽筵坐贊者坐櫛設纚賓降主人降賓辭主人對賓盥卒壹揖壹讓升主人升復初位賓筵前坐正纚興降西階一等執冠者升一等東面授賓賓右手執項左手執前進容乃祝坐如初乃冠

興復位贊者卒冠者興賓揖之適房服玄端爵韠出房南面賓揖之卽筵坐櫛設筭賓盥正纁如初降二等受皮弁右執項左執前進祝加之如初復位贊者卒紘興賓揖之適房服素積素韠容出房南面賓降三等受爵弁加之服纁裳韎韐其他如加皮弁之儀

此三加冠也贊者贊冠者盥將行事潔其手也洗在東榮南旣盥復西由賓階升過東房立房戶內西面將冠者之左稍南也以南爲上冠席主賓俱在南也主人之贊者家臣或親戚輩設冠席于東序適子冠于阼也少北主人在序端却避也將冠者出房戶外

南面立聽賓命也贊冠者取纓并櫛置席南端奠置也于席端避升降也揖舉手推而進也卽就也古者坐曲膝卽今晚也冠者坐贊者亦坐爲櫛髮加纓也賓將加冠降西階往東榮盥主人不安其位亦降賓辭主人主人對不敢不降也賓旣盥復由西階升堂過東序筵前坐爲冠者正纓起還西下賓階一級取緇布冠執匱者自西階升一等東面以冠授賓冠後曰項冠面曰前進進筵前容從容也將致祝辭從容整儀也祝祝願冠者吉祥也辭見後賓旣祝復坐以緇布冠加冠者首賓起復西序之位贊者爲結冠纓

卒事冠者起賓揖使入房釋采衣著玄端爵韠不言
裳帶卽前所陳緇帶玄黃雜裳皆可也出房南面立
者始成人觀衆以容體且待賓再命此初加之禮也
賓再揖就席將加皮弁也脫緇布冠再櫛髮未弁而
先設筭者筭在筵端不與弁同處筭首有紘須先設
而理之也賓降西階二等受皮弁皮弁尊于冠降禮
重也賓加皮弁還西序贊者爲之結紘于筭末卒事
冠者起賓又揖使入房著皮弁服玄端帶如故但裳
韠易素耳容從容整儀出房南面立觀于衆此再加
之禮也賓降三等以下三加爵弁也服以纁裳易素

積以黹韜易素韞不言衣亦玄端但純耳不言賓揖
卽筵及適房等禮同也賓降三等者爵弁尤尊降愈
重也

徹皮弁冠櫛筵入于房筵于戶西南面贊者洗于房中
側酌醴加柶覆之面葉賓揖冠者就筵筵西南面賓受
醴于戶東加柶面枋柄筵前北面冠者筵西拜受解賓
東面答拜薦脯醢冠者卽筵坐左執解右祭脯醢以柶
祭醴三興筵末坐啐醴捷建柶興降筵坐奠解拜執解
興賓答拜冠者奠解于薦東

此旣冠而醴冠者也三加冠畢徹東序之筵冠者服

爵弁脫皮弁緇布冠于筵間徹筵則弁皮弁冠櫛俱徹而納之房中更設筵醴冠者于室戶西牖間南向卽堂中客位也醴于客位以成人尊之也贊冠者洗解于房中甌醴在房就房中酌之側特也特一酌無三醴也枳匙也所以挑醴橫覆于解上葉匙首寬薄如葉以葉向前柄在後授賓賓以授冠者則柄仍在後便執也冠者就筵西南面立賓往戶東受醴加枳柄居前枋柄通賓以醴來筵前北面將授冠者冠者南向拜于筵西受醴賓還西序東向答拜贊者薦脯醢冠者取脯醢少許置豆間祭先食又以枳葉挑醴

祭之者三祭則坐于筵間飲則坐于筵末啐微飲也
捷當作建立也未祭覆解上待用旣祭插于解中醴
間也降筵出筵西也旣飲執解起出筵跪置解于筵
間拜復跪取解起奠于薦東賓答拜答于西序也薦
東脯醢東南向以左爲東凡解飲則奠于饌右以便
舉不飲則奠于饌左

按酌醴惟贊者洗解于房中賓不降洗于東榮禮質
而簡與醢異也鄭解側酌謂無人爲薦非也言贊者
一酌醴與醢賓三酌酒于房戶間異故側尊與兩無
亦異也捷柶昏禮作建柶鄭謂捷當作插亦通

降筵北面坐取脯降自西階適東壁北面見于母母拜受子拜送母又拜

此旣冠見于母也醴畢冠者降筵將入見母跪取幣閒脯爲贄降自西階父在不敢由阼也東壁廟東側室冠子則父主外事在東序母主內事在東壁子旣冠入見也拜受拜送皆脯也母拜受而後子拜送母先拜也古者婦人肅拜少儀云婦人雖君賜肅拜肅拜者立拜也男子跪拜婦人立拜故古婦人與男子爲禮必俠拜俠拜者婦人先一拜男子答拜婦人又一拜也子拜送母又拜卽俠拜也

按父尊母親故凡禮母殺于父禮下餽上餘子受薦祭脯卽子之餘也豈堪爲贊懷脯啖母勞其母拜而又拜謂敬成人乎何至拜其子乃爲敬也父在昨未拜而先拜母不後其父乎諸家多爲之辭未見其允鄭註東壁爲闔門外古廟在宅東由廟中入宅曰闔門果爾當云適西壁何爲反適東壁乎有事于宗廟宜夫婦共親之豈父在廟母獨在宅乎非也

賓降直西序東面主人降復初位冠者立于西階東南面賓字之冠者對賓出主人送于廟門外請醴賓賓禮辭許賓就次

此旣冠而賓字冠者也。醴事畢。賓降西階下。當西序東面立。主人降東階下。復初卽之位。直東序西面對。賓立待字也。冠者立于西階下之東。南面。賓之東北。聽賓命也。字以代名也。辭見後對。應也。賓出。出廟門也。請醴賓。主人請設醴酒飲賓也。次設醴之處。

按主人降復初位。鄭謂初至階讓升之位。非也。

冠者見于兄弟。兄弟再拜。冠者答拜。見贊者。西面拜。亦如之。入見姑姊。如見母。乃易服。服玄冠。玄端。爵韠。奠贊見于君。遂以贊見于鄉大夫。鄉先生。

兄弟先拜者。見而起敬也。時正賓與主人先出。兄弟

與贊猶在廟見贊者以客禮拜謝贊者亦答再拜父
之姊妹曰姑女兄曰姊如見母亦北面再拜姑姊亦
俠拜也此以前皆爵弁服將見君與大夫長者則易
緇布冠服玄冠卽緇布冠玄冠玄端卽士之朝服奠
贊謂執贊奠于地乃再拜稽首不敢親授見尊者之
禮也鄉大夫司一鄉之大夫在位者也鄉先生致仕
居鄉者也

按鄭謂贊者後賓出則是拜贊者于廟中也拜贊者
于廟則拜兄弟亦于廟兄弟在廟則拜而父且未拜
也贊在廟則拜而賓且未拜也姑姊不必皆在廟亦

往拜鄉先生不在廟亦往見則是拜者又不必皆在廟中者也。豈拜父拜賓又別有禮與冠于廟而無拜祖考之禮則是書所言亦禮之太畧通其義而可矣。爵弁士服之貴者初冠無爵自不敢以貴人之服見君大夫禮也。鄭謂助祭然後得服夫助祭則有爵矣初冠何助祭之有。古者士之子常爲士子雖無爵而成人之始以世業望其子可也。若謂獨助祭可服豈可以私服其子乎。鄭又謂易服不朝服非朝事也。然則玄端與朝服異矣。要之朝服之緇衣卽是玄端玄冠卽是緇冠。但古用布今用帛若緇冠外別有玄冠

則三加何獨遺之邪

乃醴賓以壹獻之禮主人酬賓束帛儷皮贊者皆與去聲贊冠者爲介賓出主人送于外門外再拜歸賓俎

醴賓以醴獻賓也一獻謂主人一酌獻賓賓酢主主酬賓畢卽升席燕以幣送酒曰酬十端曰束凡帛一匹從兩端卷至中十端爲五匹也儷雙也皮獸皮有毛者贊者皆與謂凡贊佐冠事者皆得與燕也介次賓也外門大門也賓旣去主人再拜送徹燕賓之俎隨賓歸也

按醴用一獻卽側尊側酌之意尚質故簡鄭謂一獻

無亞獻以主婦不從非也。主婦獻賓莫先于冠子。獻冠賓無主婦。他賓又何必婦人乎。此禮非古。何獨無婦人爲一獻也。卽有婦人在。如昏禮舅姑共饗婦。亦謂之一獻耳。

若不醴則醯用酒。尊于房戶之間。兩甌有禁。玄酒在西。加勺南枋。洗有篚在西。勺南順。始加醯用脯醢。賓降取爵于篚。辭降如初。卒洗升酌。冠者拜受。賓答拜如初。冠者升筵坐。左執爵。右祭脯醢。祭酒興。筵末坐。啐酒降筵。拜。賓答拜。冠者奠爵于薦東。立于筵西。徹薦爵。筵尊不徹。加皮弁如初儀。再醯攝酒。其他皆如初。加爵弁如初。

儀三醯有乾肉折俎齊祭之其他皆如初北面取脯見于母

此既冠醯子之儀醴有變爲醯者醯醢也盡飲之名醴一酌醯三酌加折俎盛者殺牲較醴多文矣凡禮先質而後文醴與醯皆歷世已行之跡若者隨時不定之辭若醴則用醴若醯則用酒醴濁而酒清醴設尊于房內醯則尊于堂東房戶間筵之東賓主共之也醴一甌無禁無玄酒有勺在筐不加于尊醯酒則兩甌有禁有玄酒在西加勺尊上南其柄便執也承尊之器曰禁禁傾危也水曰玄酒不忘本也玄水色

洗設東榮與醴同。但醴盥手不洗爵。篚盛爵洗于房內。醴則篚盛勺。解堂下洗之。西也。南順。猶南向。賓贊由西階下。自南取爵便也。醴則三加畢後酌薦脯醢。醴則始加卽醴用脯醢也。醴則贊者洗爵。側酌于房中。醴則賓降西階過東榮取篚中爵。主降賓辭洗爵畢。西升酌酒堂上與醴異也。冠者升筵坐祭啐酒于筵末。拜賓奠解于薦東。立筵西與醴同也。醴三加畢一酌卽徹。醴則每加一醴。始醴所徹者惟脯醢之薦與旣奠之爵。其筵與尊不徹。以待再醴三醴也。再加皮弁。醴儀與初同。攝重也。如官事不攝之攝一爵重。

酌無酬酢不更爵再洗也。加爵弁三醺有乾牲斷折爲俎。醴則惟脯醢而已。齊嘗也。取乾肉祭而嘗之。他皆如初。醺之儀用乾肉不殺也。三醺畢北面取脯見母與醴同。

按鄭云酌而無獻酬謂醺然則醴有獻酬乎。謂醺從俗。醺古禮非俗也。或謂醺不祝。或謂醺爲庶子冠皆非也。醺與醴同而質文異耳。

若殺則特豚載合升。離肺實于鼎。設局鼎。始醺如初。再醺兩豆。葵菹羸醢。兩簋栗脯。三醺攝酒如再醺。加俎齊之皆如初。齊肺卒醺取邊脯以降如初。

此詳言醢禮也。上所云醢止于乾肉折俎而不殺牲。此言其盛則殺牲。牲用豚。特豚一豕也。載載之俎升。自鑊升鼎也。鑊無足而卑。鼎三足而高。故曰升。殺牲解體煮于鑊。熟而升于鼎。和之以薦也。合左右體離割也。肺卽豕肺。周入尚肺。火德勝金。祭食先肺。肩鉉也。鼎兩旁有鉉。反向上。以木橫貫蓋上而舉之。且以壓制鼎蓋如門之扃。無竅通密閉也。始加緇布冠之醢。如前醢儀。再加皮弁之醢。前用脯醢。此則脯醢外加兩豆。一葵菹。一羸醢。葵菹以肉和葵淹爲菹。羸蛤屬。圓者爲羸。剉而漬之以酒爲醢。外加兩蓬。一粟。

一脯此再醢異于前者也。三加爵弁之醢始洗爵再
攝酒三如再所異者加豚俎也。其齊之與前齊乾俎
同齊肺謂祭肺齊之齊同而肺異醢畢取脯降見母
與前同但前取薦脯此取加蓬之脯薦脯既齊蓬脯
未齊他皆如前儀

按此殺豚合升所以異于前之乾肉折俎也。乾肉之
體不必全特殺則全體凡用牲體吉取右凶取左此
合左右同升貴偶也。凡言齊必先祭未有齊而不祭
者既云加俎齊之又云齊肺則祭不言可知。鄭謂齊
當作祭非也。

若孤子則父兄戒宿冠之日主人紒而迎賓拜揖讓立于序端皆如冠主禮於阼凡拜北面于阼階上賓亦北面于西階上答拜若殺則舉鼎陳于門外直東塾北面若庶子則冠于房外南面遂黜焉冠者母不在則使人受脯于西階下

此孤子與庶子冠及母不在廟之儀孤子無父則自爲主在家則成尊在外則童子不可與成人爲禮故戒宿賓客則諸父與諸從兄爲之也主人卽將冠者紒總角也出迎賓拜揖讓入廟升階立于東序端皆如父在爲主之儀三加皆于阼階主位行禮不于房

戶外也。凡醴醢拜受拜謝主皆北面拜于阼階上賓皆北面答于西階上。據主賓正位異前冠者拜于筵西南面賓拜于西序東面也。若用醢禮殺牲舉鼎陳于廟門外當東塾之南鼎北面禮君陳鼎南面喪鼎西面餘皆北面也。陳于此舉而後入也。父在醢子鼎陳於內私之也。孤子自主陳于外盛之也。他儀如前此孤子冠之禮。庶子非適醢不別設筵不于客位卽房戶外冠筵醢之三加三醢同也。凡冠于廟父在東序母在東壁如母偶有故不在子取脯降自西階將往見母使人卽西階下受脯俟他日再見必于西

階者客之也

戒賓曰。某有子某。將加布於其首。願吾子之教之也。賓對曰。某不敏。恐不能共。恭事以病吾子。敢辭。主人曰。某猶願吾子之終教之也。賓對曰。吾子重蟲有命。某敢不從。宿曰。某將加布於某之首。吾子將莅之。敢宿。賓對曰。某敢不夙興。始加。祝曰。令月吉日。始加元服。棄爾幼志。順爾成德。壽考惟祺。介爾景福。再加曰。吉月令辰。乃申爾服。敬爾威儀。淑慎爾德。眉壽萬年。求受胡福。三加曰。以歲之正。以月之令。咸加爾服。兄弟具在。以成厥德。黃耇苟無疆。受天之慶。醴辭曰。甘醴惟厚。嘉薦令芳。拜受

祭之以定爾祥。承天之休。壽考不忘。醯辭曰。旨酒既清。嘉薦亶時。始加元服。兄弟具來。孝友時格。永乃保之。再醯曰。旨酒既清。嘉薦伊脯。乃申爾服。禮儀有序。祭此嘉爵。承天之祜。三醯曰。旨酒令芳。邊豆有楚。咸加爾服。肴升折俎。承天之慶。受福無疆。字辭曰。禮儀既備。今月吉日。昭告爾字。爰字孔嘉。髦士攸宜。宜之于假。永受保之。曰伯某甫。仲叔季唯其所當。

此行禮之辭。上敘其儀。此述其辭。戒謂既筮日預告之也。加布加冠也。古冠用布。病吾子。猶言辱吾子。宿謂冠前一日速賓。始加。加緇布冠。元服首服也。再加。

加皮弁令善也。胡與遐通。三加。加爵弁。黃黃髮者。老人。句。僂貌。宣誠也。時猶新也。時格猶言是至。滑清也。楚齊貌。髦士。幼俊之稱。攸宜。猶言相稱假大也。甫丈。夫之稱。伯仲叔季。兄弟之序。各稱其序字之也。按祝辭雜用詩語。多後人補撰。爾雅考老壽說文老人面凍黎色若垢。承黃字作解。鑿也。

屨夏用葛玄端黑屨青絢。渠總意純純博寸。素積白屨以魁柎之。緇絢總純純博寸。爵弁纁屨黑絢總純純博寸。冬皮屨可也。不屨總。歲屨

此記三加冠之屨。不與前弁敘者。冠屨之別也。若夏

月冠則葛屨屨色各從其裳與鞵色。緇布冠服玄端
玄裳爵鞵黑屨飾以青。紬屨頭飾也。紬鉤也。屨形上
曲如鉤。又紬拘也。戒行也。上下縫際曰縷。緣邊曰純。
三者皆用青色。博寬也。白屨與素積素鞵色同。魁頭
也。拊跗同底也。卽士喪禮綦結于跗之跗以魁跗之
謂以頭爲底。如今鞵頭反底向上也。白屨緇飾惡純
素近凶也。爵弁服纁裳韎韐故纁屨三屨黑白赤兼
三代之尚。冬屨非定用皮溫不厭厚皮可也。若夏暑
止可用葛其麻布四升有半者曰總。喪服有總衰以
總爲屨近凶大功未可冠子故冠不用總屨。

按鄭解魁爲蜃蛤以蜃灰附屨上使白近鑿本草因之遂名大蛤爲魁蛤魁大也凡物大者皆名魁何獨蛤邪

記○冠義始冠緇布之冠也大古冠布齊齊則緇之其緇也孔子曰吾未之聞也冠而敝之可也適子冠于阼以著代也醺于客位加有成也三加彌尊諭其志也冠而字之敬其名也委貌周道也章甫殷道也母牟追堆夏后氏之道也周弁殷皐夏收三王共皮弁素積無大夫冠禮而有其昏禮古者五十而後爵何大夫冠禮之有公侯之有冠禮也夏之末造也天子之元子猶士

也。天下無生貴者也。繼世以立諸侯。象賢也。以官爵人德之殺也。死而諡。今也。古者生無爵。死無諡。

記卽作儀禮者。記之冠義。禮記篇名。凡言記者。記前文所未備。後倣此。始冠。謂始加冠。上古白布冠。祭而齊。則緇布。鬼尚幽也。後世冠用緇帛。緇冠纓之餘而垂爲飾者。緇布冠無緇尚質也。雜記曰。太白與緇布之冠不飾。故引孔子言。未聞布冠有緇者。敝壞也。冠而敝之言。但始冠一用布。敝卽不再製。故不用文飾也。適子冠于阼以下。別記所聞。冠必行于東階主位也。著明也。以明適子成人。將代父爲主也。客位室戶。

西牖閒加嘉也。三加彌尊。謂皮弁尊于緇布冠。爵弁又尊于皮弁。諭其志。謂教立志大成也。敬其名。以字諱名。敬不敢斥名也。委貌。章甫。母追。三者皆緇布冠。弁。皐收三者皆爵弁。而制各異。惟皮弁三代共之。貴質也。古緇布冠小。夏爲母追。猶言牟堆。小貌。殷制稍起而爲章甫。甫舊作斧。制如斧。方而小也。至周而大可。籠首曰委貌。言下委成貌也。弁。槃也。槃大也。制大于冠。詩云有頍者弁。頍傾也。覆額貌。皐言謂亦大也。收斂也。斂髮也。周制大于殷。殷制大于夏。弁用皮不忘古也。積用素尚其質也。無大夫以下。明冠禮所以

獨士之義古者男子二十成人始冠十九以下猶童三十而室四十而仕五十爲大夫年五十艾矣故大夫無笄無冠禮而有昏禮者五十再娶則有之大夫旣然諸侯可知古者諸侯二十以前雖繼世猶用士禮必旣冠受王命然後得爲諸侯至夏末傳賢風藐家國天下皆以世繼諸侯有未冠繼立者于是始爲諸侯冠禮非古也微獨諸侯古天子適長子猶士也其冠亦以士未有人始生卽貴爲天子諸侯者須有德然後爵以位天子之子非生卽宜王必爲士脩德德成繼立所以幼而冠亦士禮也天子且然諸侯可

知諸侯必年長有德象先世之賢然後命爲諸侯方其爲世子冠亦以士而大夫又可知故先王以官爵人因德大小爲降殺生以有德命爵死以有德命諡生無爵而死有諡皆私意今之失禮非古也故古者非成人有德不得爲大夫所以無大夫冠禮耳

按古無大夫冠禮亦附會之說禮所以獨有士者禮莫不始于士也明乎士禮而大夫以上可引而伸之加其等益其數天子諸侯皆可知矣今謂五十爲大夫故無大夫冠禮天子諸侯未聞必五十而後爲其亦無冠禮又何也玉藻云玄冠朱組纓天子之冠緇

布冠績綬諸侯之冠大戴記云諸侯冠禮四加玄冕
春秋傳云公冠用祿享之禮行之金石之樂節之此
禮謂皆起于夏末乎焉知士冠之獨始于古也古有
士卽有大夫有士冠卽有大夫冠而諸侯天子所損
益可知也